



KEMENTERIAN DALAM NEGERI
JABATAN PENDAFTARAN NEGARA

MAKLUMBALAS MEDIA JABATAN PENDAFTARAN NEGARA

“SAYA MASIH HIDUP-BASNI SABRAH”

Jabatan Pendaftaran Negara (JPN) merujuk kepada beberapa siri artikel di akhbar Utusan yang mengulas isu terdapat 2 individu miliki MyPR dengan nama Basni Sabrah.

Berhubung laporan akhbar tersebut, semakan di pangkalan data JPN mendapati Basni Sabrah yang masih hidup adalah pemilik MyPR yang sah dan kekeliruan yang berlaku mungkin disebabkan MyPR Basni yang pernah dilaporkan hilang sebelum ini, ditemui dan telah disalah gunakan oleh pihak lain. Walaupun satu pihak lagi yang disyaki menggunakan MyPR yang hilang tersebut telah meninggal dunia, JPN akan melakukan risikan dan siasatan terhadap kebarangkalian yang ada berkaitan kes ini.

MyPR merupakan salah satu jenis Kad Pengenalan yang dikeluarkan oleh Jabatan ini kepada Pemastautin Tetap. Pemastautin Tetap adalah berstatus bukan warganegara. Ianya dikeluarkan kepada yang berkelayakan berdasarkan permit masuk dari Jabatan Imigresen Malaysia (JIM). MyPR yang berwarna merah ini mempunyai semua data utama pemilik termasuk nombor permit dan maklumat negara asal.

Proses pengeluaran MyPR telah menjalani tapisan oleh beberapa Jabatan seperti PDRM, JIM dan JPN. Malah setiap permohonan yang telah diluluskan perlu melalui proses saringan ketat termasuk pengesahan biometrik. Kesianambungan perlindungan dan penjagaan MyPR tersebut adalah terletak kepada pemiliknya. Malah Peraturan 6, Peraturan-Peraturan Pendaftaran Negara 1990 (PPN) juga memperuntukkan kewajipan setiap pemilik menjaga kad pengenalan masing-masing.

Sekiranya berlaku kehilangan, ianya mestilah dilaporkan dengan segera kepada JPN. MyPR yang telah dilaporkan hilang akan dibatalkan di dalam sistem JPN. Justeru, kad yang hilang tersebut bukan lagi satu kad yang sah diguna pakai untuk sebarang urusan. Namun terdapat segelintir pihak yang tidak bertanggungjawab yang menjumpai kad tersebut dan menggunakan identiti pemilik sebenar itu. Modus operandi ini akan dapat dikesan sekiranya pengesahan biometrik dibuat, di mana akan membuktikan pemegang bukanlah pemilik sebenar.

Menggunakan kad pengenalan orang lain merupakan satu kesalahan di bawah Peraturan 25(1)(e) Peraturan-peraturan Pendaftaran Negara (PPN) 1990 dan jika sabit kesalahan boleh dikenakan hukuman penjara tidak lebih tiga tahun atau denda tidak lebih RM20,000 atau kedua-duanya sekali.

JPN ingin mengingatkan kepada pemegang MyPR, Kerajaan tidak teragak-agak untuk menggunakan semua lunas perundangan yang ada untuk menghukum mana-mana pihak yang bersekongkol dengan pihak tidak bertanggungjawab kerana MyPR yang hilang boleh disalah guna dan boleh menggugat keselamatan negara ini. Orang awam yang mengetahui perkara seumpamanya juga diseru untuk tampil menyalurkan maklumat tersebut kepada JPN.

JABATAN PENDAFTARAN NEGARA

23 JUN 2023

Jabatan Pendaftaran Negara (JPN) adalah sebuah Jabatan di bawah Kementerian Dalam Negeri yang bertanggungjawab mendaftar peristiwa-peristiwa penting setiap individu seperti maklumat kelahiran, kematian, pengangkatan, perkahwinan dan perceraian. Di samping itu, JPN juga bertanggungjawab dalam menentukan taraf kewarganegaraan dan seterusnya mengeluarkan dokumen identiti individu dalam bentuk kad pengenalan kepada mereka yang layak.

Dikeluarkan Oleh: *Unit Komunikasi Korporat
b.p. Ketua Pengarah
Jabatan Pendaftaran Negara
Telefon: 03-8880 7077 | E-mel: pro@jpn.gov.my*